

er muß das fixe so oft flüchtig / vñnd das flüchtig so oft bestendig machen / biß es alles bestendig werde vñnd fließe / vñnd in ein wahr Goldt vñnd Silber verkeere. Dann also wirdt ein Krieg angericht / das ist der coagulirte Sulphur wirdt zerstört / mit dem flüchtigen Mercurio, vñnd wirdt auch ein freundschaft gemacht zwischen den Elementen. Von welchem Rasis sagt: Der Geist wirdt in ein Corpus verwandelt / vñnd das Corpus in ein Spiritum, vñnd widerumb das Corpus in Spiritum, vñnd wider der Spiritus in Corpus, vñnd als dann ist ein freundschaft gemacht zwischen dem kalten vñnd warmen / vñnd vnder dem feuchten vñnd trucknen. Vñnd diß geschicht allein durch die krafft Gottes / vñnd das temperament des feurs / vñnd durch messigung desselben Terminen / wie oft gesagt.

Aber lasset vns jetzt das Fundament vñnd wurzel der Fixion oder bestendigkeit besehen.

Die nechste wurzel aber bey der bestendigkeit ist der Sulphur dann dieser ist allein der den Mercurium coagulirt. Es ist aber eben eins / das coagulierende vñnd das figirende. Vber das muß auch die Medicin fix sein / vñnd der Sulphur der den Mercurium vollkommen macht / muß nothwendig bestendig sein. Ein solcher Sulphur aber ist nicht der gemeine Sulphur, dann derselbe ist verbrentlich. Solche aber sindt nur zwey nemlich Sol vñnd Luna. Derhalben bereitten wir diese zwey Corpora subtil / das wir auß ihnen auß der erden den Sulphur haben mögen / mit welchem wir den Mercurium tingiern: wie er vnder der erden thut (wie Avicenna sagt) diese zwey Corpora sindt nicht mineralisch / sonder wie droben gesagt ist / so sindt sie animalisch. Man muß aber diese Corpora mit dem Mercurio sublimiern / biß dz ganze auffsteige mit dem Mercurio, nicht mit dem gemeinē / sonder mit dem Mercurio, der auß den corporen ist / weñ nemlich das geschir beschlossen ist / also das der Mercurius nicht könne her auß gehen / dan er wirdt nicht sublimiert / dem durch krafft des luffts. Vñnd darumb wenn es einen ofnen ohrt findt / so wirdt es im rauch hinweg fliehen / vñnd die ganze meisterschaft verderbt werden. Derselbe Mercurius aber wirdt durch krafft des weissen vnverbrentlichen Sulphuris coagulirt werden. Vñnd dieser Mercurius wenn er rein ist / vñnd das jene / ist das beste von welchem die Alchimisten können Silber machen / das ist / ein Elixir zu dem weissen. Wenn aber der Sulphur außs best ist / clar mit einer röte / vñnd mit jm ist die tugent der silberkeit vñnd truckenheit auch vnverbrentlich / so wirdt es das beste ding sein / zu dem Elixir Solis zu machen. Vñnd erstlich zwar kan es der weisse Sulphur, darnach der rote / dann es kan nichts zu Goldt werden es sey dann zuvor Silber. Dieses ist die meinung Ignoti, vñnd (wie man glaubt) des Alphidii, vñnd deßgleichen Rosarii. Also ist nun die nechste wurzel der bestendigkeit